



## **PRAVILNIK**

**o prijavi i uslovima za ovjeru političkih subjekata za učešće na Općim izborima 2018. godine**

---

Sarajevo, april 2018. godine

Na osnovu člana 2.9 stav (1) tačka 2, a u vezi člana 4.4, 4.5 stav (2), 4.10, 4.11, 4.12, 4.13, 4.15, 4.19, 4.22 stav (1) i 4.24 Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 07/14 i 31/16), Centralna izborna komisija Bosne i Hercegovine je na 14. sjednici, održanoj 19.04.2018. godine, donijela

## **PRAVILNIK**

### **o prijavi i uslovima za ovjeru političkih subjekata za učešće na Općim izborima 2018. godine**

#### **Član 1. (Primjena)**

Ovim pravilnikom utvrđuju se:

- a) način podnošenja prijava za ovjeru i uslovi za ovjeru političkih subjekata,
- b) način podnošenja potpisa podrške i uslovi oslobađanja obaveze prikupljanja potpisa podrške, te način provjere i potvrđivanja potpisa podrške,
- c) način podnošenja i visina takse uz prijavu za ovjeru političkih subjekata i
- d) obrasci za podnošenje prijava za ovjeru političkih subjekata, kao i obrasci kandidatskih listi i propisanih izjava,

za učešće na Općim izborima 2018. godine.

#### **Član 2. (Način podnošenja prijava za ovjeru - član 4.4 stav (1), član 4.10, član 4.12, član 4.15, član 4.19 stav (4) i član 4.24 Izbornog zakona BiH)**

- (1) Prijave za ovjeru političkih subjekata, kao i prijave kandidata i kandidatskih listi podnose se na obrascima koji su sastavni dio ovog pravilnika.
- (2) Raspodjela kandidata manje zastupljenog spola na kandidatskim listama vrši se prema Instrukciji koja je sastavni dio ovog pravilnika.

#### **Član 3. (Uslovi za ovjeru prijave - član 1.6, član 1.13, član 4.3 i član 15.1 Izbornog zakona BiH)**

- (1) Političke stranke i nezavisni kandidati uz prijavu za učešće na Općim izborima 2018. godine, pored potpisa podrške iz člana 4.4 Izbornog zakona BiH, podnose sljedeću dokumentaciju:
  - a) Rješenje o upisu u registar kod nadležnog organa; ukoliko je rješenje starije od 60 dana dostaviti i izvod iz sudskog registra koji nije stariji od 60 dana, u skladu s članom 4.3 Izbornog zakona BiH (podnose samo političke stranke);
  - b) izjavu propisanu članom 1. 6 i 1.13 Izbornog zakona BiH;

- c) dokaz o uplaćenom novčanom iznosu takse za ovjeru u skladu s članom 4. ovog pravilnika i
- d) finansijski izvještaj koji obuhvata period od tri (3) mjeseca prije podnošenja prijave, u skladu s članom 15.1 Izbornog zakona BiH.

#### **Član 4.**

##### **(Visina takse za ovjeru - član 4.16 stav (1) Izbornog zakona BiH)**

(1) Taksa za ovjeru prijave političkog subjekta za učešće na Općim izborima 2018. godine određuje se u visini novčanog iznosa, kako slijedi:

a) Političke stranke:

- 1) 20.000 KM za izbore za članove Predsjedništva Bosne i Hercegovine;
- 2) 20.000 KM za izbore za poslanike u Predstavničkom domu Parlamentarne skupštine Bosne i Hercegovine;
- 3) 14.000 KM za izbore za poslanike u Predstavničkom domu Parlamenta Federacije Bosne i Hercegovine, predsjednika Republike Srpske i poslanike u Narodnoj skupštini Republike Srpske i
- 4) 10.000 KM za izbore za poslanike u kantonalnim skupštinama u Federaciji Bosne i Hercegovine;

b) Nezavisni kandidati:

- 1) 10.000 KM za izbore za članove Predsjedništva Bosne i Hercegovine;
- 2) 10.000 KM za izbore za poslanike u Predstavničkom domu Parlamentarne skupštine Bosne i Hercegovine;
- 3) 7.000 KM za izbore za poslanike u Predstavničkom domu Parlamenta Federacije Bosne i Hercegovine, predsjednika Republike Srpske i poslanike u Narodnoj skupštini Republike Srpske i
- 4) 5.000 KM za izbore za poslanike u kantonalnim skupštinama u Federaciji Bosne i Hercegovine.

(2) Političke stranke i nezavisni kandidati obavezni su novčani iznos takse za ovjeru iz stava (1) ovog člana uplatiti sa svog transakcijskog računa koji će se namjenski koristiti za izbornu kampanju tokom Općih izbora 2018. godine, na račun JRT broj: 000003000000145 kod Centralne banke BiH, svrha uplate: uplata takse na podračun Centralne izborne komisije BiH broj 37111614.

(3) Novčani iznos takse za ovjeru političke stranke ne uplaćuju pojedinačno za svaki organ, već uplaćeni iznos takse za ovjeru za viši organ vlasti važi i za niže nivoe organa vlasti, osim u slučaju kandidiranja za izbor članova Predsjedništva Bosne i Hercegovine.

(4) Uplaćeni novčani iznos takse za ovjeru se vraća na način utvrđen članom 4.16 Izbornog zakona Bosne i Hercegovine.

(5) Centralna izborna komisija BiH pokrenut će proceduru povrata novca kod nadležnog organa u roku od 15 dana od dana objave izbornih rezultata u službenim glasilima u Bosni i Hercegovini.

(6) Sredstva koja ne budu vraćena političkim subjektima po osnovama navedenim u ovom članu ostaju kao sredstva budžeta institucija Bosne i Hercegovine i međunarodnih obaveza Bosne i Hercegovine.

## **Član 5.**

### **(Način podnošenja potpisa podrške - član 4.4 stav (2), (3), (4) i (5) Izbornog zakona BiH)**

Potpisi podrške birača koji podržavaju prijavu političke stranke ili nezavisnog kandidata (u daljnjem tekstu: potpisi podrške) prikupljaju se na obrascu koji je sastavni dio ovog pravilnika.

## **Član 6.**

### **(Prikupljanja potpisa podrške - član 4.4 Izbornog zakona BiH)**

(1) Politička stranka i nezavisni kandidat obavezni su prikupljati potpise podrške za izbor članova Predsjedništva Bosne i Hercegovine i predsjednika (potpredsjednike) Republike Srpske (član 4.4 stav (5) tačka 1. i 3. Izbornog zakona BiH).

(2) Politička stranka, odnosno stranka u koaliciji koja ima izabranog člana Predsjedništva Bosne i Hercegovine ili predsjednika i potpredsjednika Republike Srpske nije oslobođena prikupljanja potpisa podrške ni za jedan organ za koji podnosi prijavu.

(3) Potpisi podrške prikupljeni za izbor:

- a) članova Predsjedništva Bosne i Hercegovine ne oslobađaju političku stranku obaveze prikupljanja potpisa podrške za izbor poslanika u Predstavničkom domu Parlamentarne skupštine Bosne i Hercegovine, Predstavničkog doma Parlamenta Federacije Bosne i Hercegovine, narodnih poslanika Narodne skupštine Republike Srpske i poslanika u kantonalnim skupštinama;
- b) predsjednika i potpredsjednika Republike Srpske ne oslobađaju političku stranku obaveze prikupljanja potpisa podrške za izbor narodnih poslanika u Narodnu skupštinu Republike Srpske.

(4) Politička stranka koja prikupi potpise podrške za izbor poslanika u Predstavničkom domu Parlamentarne skupštine Bosne i Hercegovine nije u obavezi prikupljati potpise podrške za izbor poslanika Predstavničkog doma Parlamenta Federacije Bosne i Hercegovine, za izbor narodnih poslanika Narodne skupštine Republike Srpske i poslanika u kantonalnim skupštinama.

(5) Potpisi podrške prikupljeni za izbor poslanika u Predstavničkom domu Parlamenta Federacije Bosne i Hercegovine ne oslobađaju političku stranku obaveze prikupljanja potpisa podrške za Narodnu skupštinu Republike Srpske i obrnuto.

(6) Politička stranka koja prikupi potpise podrške za izbor poslanika u Predstavničkom domu Parlamenta Federacije Bosne i Hercegovine nije u obavezi prikupljati potpise podrške za izbor poslanika u kantonalnim skupštinama.

(7) Potpisi podrške za izbor poslanika u kantonalnoj skupštini prikupljaju se pojedinačno za svaku kantonalnu skupštinu.

## **Član 7.**

### **(Oslobađanje od obaveze prikupljanja potpisa podrške - član 4.5 stav (2) Izbornog zakona BiH)**

(1) Politička stranka koja ima mandat:

- a) poslanika u Predstavničkom domu Parlamentarne skupštine Bosne i Hercegovine, oslobođena je obaveze prikupljanja potpisa podrške za izbor poslanika u Predstavničkom domu Parlamentarne skupštine Bosne i Hercegovine u bilo kojoj izbornoj jedinici, Predstavničkog doma Parlamenta Federacije Bosne i Hercegovine, narodnih poslanika Narodne skupštine Republike Srpske i poslanika u kantonalnim skupštinama;

b) poslanika u Predstavničkom domu Parlamenta Federacije Bosne i Hercegovine, oslobođena je obaveze prikupljanja potpisa podrške za izbor poslanika u Predstavničkom domu Parlamenta Federacije Bosne i Hercegovine i poslanika u kantonalnim skupštinama,

c) poslanika u Narodnoj skupštini Republike Srpske oslobođena je obaveze prikupljanja potpisa podrške za izbor narodnih poslanika u Narodnoj skupštini Republike Srpske, i

d) poslanika u kantonalnoj skupštini, oslobođena je obaveze prikupljanja potpisa podrške samo za tu kantonalnu skupštinu.

(2) Mandat delegata u Domu naroda Parlamentarne skupštine Bosne i Hercegovine, Domu naroda Parlamenta Federacije Bosne i Hercegovine i Vijeću naroda Republike Srpske ne oslobađa politički subjekt obaveze prikupljanja potpisa podrške ni za jedan organ vlasti.

### **Član 8.**

#### **(Koalicija kao nosilac mandata - član 4.13 i član 4.15 Izbornog zakona BiH)**

Ako je mandat osvojila koalicija na Općim izborima 2014. godine, smatra se da je svaka politička stranka članica te koalicije osvojila mandat i oslobođene su obaveze prikupljanja potpisa podrške.

### **Član 9.**

#### **(Način provjere potpisa podrške - član 4.11 Izbornog zakona BiH)**

(1) Provjera potpisa podrške iz člana 4.4 stav (5) Izbornog zakona BiH vrši se metodom statističkog uzorka. Veličina statističkog uzorka iznosi 10 % potpisa podrške (deset posto) od ukupnog broja podnesenih potpisa podrške.

(2) Politička stranka ili nezavisni kandidat za koje se utvrdi da su uz prijavu podnijeli manji broj potpisa podrške od zahtijevanog broja potpisa propisanih članom 4.4 stav (5) Izbornog zakona BiH neće ispuniti uslov za ovjeru, odnosno provjera potpisa podrške će biti izvršena samo za one organe za koje je podnesen dovoljan broj potpisa podrške.

(3) Za političke stranke i nezavisne kandidate koji ispunjavaju uslov iz stava (2) ovog člana označit će se određeni uzorak potpisa podrške koji će se provjeravati, vodeći računa da uzorak bude ravnomjerno raspoređen među dostavljenim potpisima podrške. Centralna izborna komisija BiH će formirati bazu podataka za provjeru koja će sadržavati: naziv političke stranke ili nezavisnog kandidata, ime i prezime potpisnika i jedinstveni matični broj potpisnika.

(4) Prvom provjerom se utvrđuje da li je birač dao svoj potpis podrške za dvije ili više političkih stranaka ili nezavisnih kandidata. Ako budu utvrđeni takvi slučajevi, potpis će se smatrati nevažećim za sve političke stranke ili nezavisne kandidate kojima je dat.

(5) Potpisi podrške provjeravat će se usporedbom unesenih podataka iz stava (3) ovog člana i podataka iz Centralnog biračkog spiska (podatka o JMB i izbornoj jedinici za koju birač ima pravo glasa), kako slijedi:

a) Potpisi podrške birača za izbor članova Predsjedništva Bosne i Hercegovine ili Predstavničkog doma Parlamentarne skupštine Bosne i Hercegovine provjeravaju se na način da li je birač koji je dao potpis podrške upisan u Centralni birački spisak;

b) Potpisi podrške birača za izbor poslanika Predstavničkog doma Parlamenta Federacije Bosne i Hercegovine provjeravaju se na način da li je birač koji je dao potpis podrške upisan u Centralni birački spisak za glasanje u nekoj od višečlanih izbornih jedinica za Predstavnički dom Parlamenta Federacije Bosne i Hercegovine;

c) Potpisi podrške birača za izbor narodnih poslanika Narodne skupštine Republike Srpske provjeravaju se na način da li je birač koji je dao potpis podrške upisan u Centralni birački spisak za glasanje u nekoj od višečlanih izbornih jedinica za Narodnu skupštinu Republike Srpske, odnosno, za izbor predsjednika i potpredsjednika Republike Srpske da li je birač koji je dao potpis podrške upisan u Centralni birački spisak za glasanje u Republici Srpskoj;

d) Potpisi podrške birača za izbor poslanika u kantonalnoj skupštini provjeravaju se na način da li je birač koji je dao potpis podrške upisan u Centralni birački spisak za glasanje za tu kantonalnu skupštinu.

(6) Potpise podrške koje podnosi nezavisni kandidat provjeravaju se na način da li je birač koji je dao potpis podrške upisan da glasa u izbornoj jedinici, odnosno, u višečlanoj izbornoj jedinici ili za glasanje za tu kantonalnu skupštinu za koju je nezavisni kandidat podnio prijavu za učešće na izborima.

(7) Za potpise podrške za koje se utvrdi da je iste dalo lice koje nije upisano u Centralni birački spisak kao birač u skladu sa stavom (5), odnosno, u slučaju nezavisnog kandidata iz stava (6) ovog člana ili u slučaju da potpis podrške nije u skladu s odredbom člana 5.13 stav (2) Izbornog zakona BiH, potpis će se smatrati nevažećim.

(8) Nakon provjere i dobivenog procenta validnih potpisa na statističkom uzorku, isti će se primijeniti na ukupan broj podnesenih potpisa podrške.

(9) Ako je broj prihvaćenih originalnih potpisa jednak ili veći od broja originalnih potpisa podrške koji se zahtijeva prema odredbama člana 4.4 stav (5) Izbornog zakona BiH, Centralna izborna komisija BiH će prihvatiti potpise podrške političke stranke ili nezavisnog kandidata.

(10) Ako je broj prihvaćenih originalnih potpisa podrške na osnovu unesenog statističkog uzorka manji od broja potpisa podrške koji se zahtijeva prema odredbi člana 4.4 stav (5) Izbornog zakona BiH, Centralna izborna komisija BiH će unijeti sve dostavljene potpise podrške, te izvršiti provjeru validnosti svih podnesenih potpisa podrške.

(11) Ukoliko se i nakon postupka utvrđenog u stavu (8) ovog člana utvrdi da politička stranka ili nezavisni kandidat nema dovoljan broj potpisa podrške utvrđen u članu 4.4 stav (5) Izbornog zakona BiH, politička stranka ili nezavisni kandidat dužan je u roku od dva dana od dana prijema obavještenja Centralne izborne komisije BiH otkloniti nepravilnost.

(12) Politička stranka ili nezavisni kandidat koji ne dopuni broj nedostajućih potpisa podrške u roku navedenom u stavu (9) ovog člana ili dopunjeni broj potpisa podrške nakon provjere bude manji od utvrđenog broja propisanog članom 4.4 stav (5) Izbornog zakona BiH, neće biti ovjereni za učešće na izborima, odnosno mogu biti ovjereni za organ za koji je podnesen dovoljan broj validnih potpisa podrške.

#### **Član 10.**

##### **(Određivanje šifre - član 4.22 stav (1) Izbornog zakona BiH)**

U svrhu vođenja evidencije o prijavama političkih subjekata za ovjeru učešća na izborima, Centralna izborna komisija BiH određuje posebne šifre s ciljem informatičke i statističke obrade podataka za političke subjekte koji podnesu prijavu za ovjeru za učešće na Općim izborima 2018. godine.

#### **Član 11.**

##### **(Prilozi)**

(1) Sastavni dio ovog pravilnika su:

- a) obrazac prijave za ovjeru političkih subjekata (političke stranke, nezavisnog kandidata, koalicije, liste nezavisnih kandidata);
- b) obrazac za prikupljanje potpisa podrške za prijavu političke stranke ili nezavisnog kandidata;
- c) obrasci za prijavu kandidata i kandidatske liste, i
- d) tabela zastupljenosti spolova na kandidatskim listama - instrukcija o raspodjeli kandidata manje zastupljenog spola na kandidatskim listama.

(2) Obrasci prijave za ovjeru i za prikupljanje potpisa podrške iz stava (1) tačka a), b) i c) ovog člana bit će dostupni u Centralnoj izbornoj komisiji BiH od dana kada Centralna izborna komisija BiH objavi odluku o održavanju izbora do dana koji je određen kao posljednji rok do kojeg politički subjekti mogu podnijeti prijavu za ovjeru Centralnoj izbornoj komisiji BiH.

(3) Obrasci iz stava (1) ovog člana štampat će se na jezicima i pismima koji su u službenoj upotrebi u Bosni i Hercegovini. Politički subjekti su dužni podnijeti zahtjev koji će sadržavati podatke o količini obrazaca, te jezicima i pismu na kojima žele da im se predaju obrasci iz stava (1) ovog člana.

(4) O svim izdatim obrascima iz stava (1) ovog člana vodi se evidencija u Centralnoj izbornoj komisiji BiH.

(5) Prilikom podnošenja prijave političkih subjekata sačinjava se zapisnik, te se smatra da je politički subjekt upoznat s eventualnim nedostacima u prijavi.

### **Član 12.** **(Prestanak primjene)**

Danom stupanja na snagu ovog pravilnika prestaje primjena Pravilnika o načinu provjere potpisa podrške i obrasci za ovjeru političkih subjekata za učešće na neposrednim izborima u Bosni i Hercegovini ("Službeni glasnik BiH", broj 37/14), Pravilnika o izmjenama Pravilnika o načinu provjere potpisa podrške i obrasci za ovjeru političkih subjekata za učešće na neposrednim izborima u Bosni i Hercegovini ("Službeni glasnik BiH", broj 43/16) i Pravilnika o načinu provjere potpisa podrške i obrasci za ovjeru političkih subjekata za učešće na neposrednim izborima u Bosni i Hercegovini – prečišćeni tekst ("Službeni glasnik BiH", broj 43/16).

### **Član 13.** **(Objava u službenim glasilima)**

Ovaj pravilnik stupa na snagu danom objave u "Službenom glasniku BiH", a objavit će se i u „Službenim novinama F BiH“, „Službenom glasniku RS“, „Službenim novinama Brčko distrikta BiH“ i na internet-stranici Centralne izborne komisije BiH [www.izbori.ba](http://www.izbori.ba).

Broj: 05-1-02-2-434-1/18  
Sarajevo, 19.04.2018. godine



Predsjednica

Dr. Irena Hadžiabdić